

良鄉縣志

良鄉縣志卷之八

藝文志

議

碑文

記

志銘

序

墓表

書

詩

傳

致飾則亨盡而受之以剝先聖于文慎矣哉然  
義繩以前已飛浩唱媧簧而後益揆奧詞者何  
歟易曰觀乎人文以化成天下禮曰命太史陳  
詩以觀民風則志終藝文斷可識已



民瘼議

蘇之屏

從來民瘼關乎

國計就今日之民瘼今民所處之時勢而備書之良鄉以彈丸小邑爲

京師屏翰萬國咽喉自明季以來地瘠民貧莫此爲甚諸蒞茲土者無不鯁鯁焉憂兢兢然慮也嗣後疊遭兵燹生民凋瘵載在冊籍者民不過八百丁驛地梗塞縣治幾廢矣故前令特疏奏請嚴催協濟車馬官良鄉縣志

卷八藝文志

議

二

吏寥寥子遺不過僅延殘喘而已自我

朝定鼎以滿漢不便雜居被圈民地撥補定州以輸

國課以裕民生其爲百姓計周且詳也况休養幾三十年宜乎生齒日繁也俯仰有資也室家保聚父母妻孥之慶樂也何爲不其然也是豈法之不善與乃法行而弊滋奉法者之不善也何也民以地爲根本自宜隨地而居何以在定者少而在良者多也說者曰一則爲本縣差徭路途阻隔應當不便也一則爲祖

宗墳墓別離不忍也一則爲地之零星沙薄室廬全無耕種爲難也於是向定民取租以

國課情理亦似相通不知往返途長盤費不貲定民且未必應手而與也延遲日久地租未全而耗費將盡矣空拳回里又懼催科限嚴沿門稱貸或典妻鬻子賣身旗下比比也詩曰醫得眼前瘡剜卻心頭肉殆良民之瘼乎幸而窮則思變良定爭訟盈庭上臺久厭惡之因俯允良民之控訴立爲永遠之規則以定

良鄉縣志

卷八藝文志

議

三

州絕地租銀徵作良民賦稅官取官解美意良法孰善于此是又良民之出萬死而獲一生也至于丁則更有難焉矣册上空名雖有二千餘數除老弱殘疲精壯者不過數百名耳衙役吏書壯快等占用實多而衙役之苦又不堪言矣日行差使紛紜絡繹卽官親身應付衙役傳催少延時刻官長遭其辱詈胥役被其鞭笞矣且借端需索恐小人之腹難饜也甚至解京銀糧晝則查看夜則巡警官長且寢食俱廢矣

又何有于衙役乎更可憂者起解逃人盜賊等事干  
繫重大常遇衙門公務數日不得投文本身工食有  
幾盤費其從何辦乎其餘老弱殘丁或傭工以養身  
或買賣以餬口或賃居街市或散處滿屯遷徙無常  
定居無所諸如運水修橋大夫大役能一呼而卽應  
乎甚有一丁逃避累及里老害及宗族者矣古云烏  
驚則飛魚驚則散良民之謂乎予惟目擊艱難甘苦  
與共痛癢相關故洞曉民情之痠痺熟觀時事之沉  
痾舉筆而直書焉儻軫念民艱就目前顛連之形建  
百年長久之策以造福於良邑予其引領望之矣

竇燕山陰德記

竇公禹鈞燕山其字也爲右諫議大夫諸子登進士  
第義風家法爲一時標表瀛海王馮道贈詩云燕山  
竇十郎教子有義方靈椿一株老丹桂五枝芳公生  
五子長曰儀次儼次侃次偁次僖儀至禮部侍郎儼  
爲翰林學士侃右補闕偁右諫議大夫參知政事僖  
爲起居郎初公三十無子夜夢亡祖亡父謂之曰汝  
命無子壽亦不永宜早修行公曰諾公爲人素長者

良鄉縣志

卷八藝文志

記

五

先有家僕盜用廊錢二百緡僕慮事覺有女十餘歲  
自寫一卷繫臂上云求賣此女以償所負自是遠逃  
公見女券甚憐之卽焚券歸女囑其妻善視之及女  
及笄又以錢二百緡擇良配嫁之僕後聞之歸感泣  
訴前罪公弗問也父女圖禹鈞像朝夕以祝公壽又  
嘗於延壽寺得黃白金若干兩持歸明日詣寺候失  
物主須臾一人哭至公問所因乃以失金告曰吾父  
犯死罪徧至親戚處貸得金銀若干將以贖罪昨以

相知治酒昏忽失去父罪不能贖矣公遂與之且加贈焉其同宗及外戚甚多貧者有喪不能葬公爲出金以葬之凡二十七人有女未能嫁公爲出金以嫁之凡二十八人或與公有一面之交見其困窘則擇其子弟可委者與以金帛使之興販自給由公而活者數百家四方賴而舉火者不可勝數每計歲之入除自奉外盡以濟人居惟以儉素自守器無金玉之飾家無衣帛之妾於宅南建一書院四五十間買書良鄉縣志

卷八藝文志

記

六

數千卷禮文行之士主師席凡有志於學者聽其自至四方之士由公門登仕籍者不可屈指及公歿人多持心喪以報公德先是公復夢亡父語曰吾前言汝無子壽短促今汝數十年修行名挂天曹延壽三紀身尊名顯子孫榮耀陰功之理善惡之報果不誣也公由是益修行享年八十二歲沐浴別親戚無疾而終五子八孫皆通顯

重修良鄉縣學宮記

知良鄉縣事 彭世昌

昔先王順人情以立教知夫人情所不習則不能責其器之備而業之精于是廣立學宮制之禮器使人日遊于橋門壁水之間俎豆干羽之地濡染其耳目陶養其性情久則天機與器數相習而不自知故終身安焉而不願乎外上之人九年以攷其成四十而試之仕而士亦因之自勵故其器之備也自簡廉直溫剛塞恭愿以及中和孝友皆能盡其微妙而無有良鄉縣志

卷八藝文志

記

七

麤疎傲戾之氣其業之精也自唐虞三代以下之典章鞮譯象寄之語言以及射御操縵雜服之技凡可爲國家天下用者皆能貫而通之而無鹵莽生澀之弊伊古以來學校興則人文盛學校廢則人文衰如影響焉莫之爽也我

國家稽古右文崇儒講學今將二百年矣海隅之內罔不宮牆相望絃誦相聞傑士才人不擇地而有矧其在



輦轂之近哉良鄉首善要地距京師六十里許近

天子之光沐

聖人之教無甚於此者宜才人傑士接踵而生器無不備業無不精奮風雲光史策有倍于荒甸外者顧數十年來聲稱寂若科第蔑如嗚呼詎非以學校荒圯久而不治之故與夫學校荒圯有司之責亦紳耆之羞也而爲良邑之有司紳耆抑獨有甚苦焉蓋幅員不及百里戶口不及數千土田磽瘠大半皆爲旗產故

良鄉縣志

卷八藝文志

記

八

居民無士著一鄉之中求所謂中人之產者十不得一二士皆環堵蕭然宿春不具學校荒圯有蒿目焉而無可爲力者且邑當孔道車書輻輳星使犇馳有司治事外持手版迎謁道周而芻菱酒食踟躕橫索之音日填于耳雖有長才供帳應酬之不暇學校之不治所以恆不暇爲也壬辰歲杪余奉

特旨來蒞茲土下車謁

廟心竊傷之會以歲饑不克卽謀修葺逾年天又降災大

水漂蕩民舍而官廨亦爲之空徙寓僧廬辦公無所  
勢又不得不急營焉乃白之大吏請於

朝給發帑金八閱月而後官廨告成事于是得與胡李  
兩廣文大召生徒共商斯舉余與兩廣文先割薄俸  
以爲之倡都人士亦皆踴躍輸將繼乎其後銖積寸  
累共得緡若干鳩工庀材擇茂才數人董其事經始  
于丙申二月告成于本年月日泮池兩廡大成櫺星  
之門鄉賢名宦之祠以及禮門義路次第畢舉煥然

良鄉縣志

卷八藝文志

記

九

改觀向之隘者今加敞向之卑者今加崇向之樸者  
今加植向之無者今加增而且丹其棗楹飾其戶牖  
几筵鐘鼓粲然具陳庶幾春秋釋奠濟濟踴踴睹美  
富宏規作身心之嚴翼此一役也以彫敝之鄉興久  
墜之業始頗虞其難繼甚樂其易是知人情皆善聖  
賢之在人心無敢忽也是亦一陽來復文明之一大  
轉機也安知才人傑士不自此接踵而生器無不備  
業無不精奮風雲光史策有大副乎

國家稽古右文崇儒講學之化者則興廢舉墜所關詎  
淺鮮哉雖然猶有憾明倫之堂師儒所以出教也尊  
經之閣生徒所以稽古也維時缺於貲而未遑及異  
日廉俸稍餘當與諸君子共竟斯業庶免不全不備  
之憾與

良鄉縣舊志序

康熙十二年癸丑 邑人張 璠

歲在壬寅愚縮尺組治古乾侯視事再稔政紀粗立  
爲邱志纂詳已而事竣撫卷嘆曰宰是邑而志生吾  
邑而弗克志豈古者重父母國之義哉詩曰維桑與  
梓必恭敬止委文獻于草莽恭敬之謂何先是仲氏  
大公令澠池成澠志亦用倦然懷本欲求良志纂緝  
而未逮也茲以尙書郎拜侍御史臺事間發笥取余  
所構舊志而續之緘書問序於余余尋素懷遂勿讓

良鄉縣志

卷八藝文志 序

七

以卒業焉留質於邑父母以待鈇梓謹序之曰君子  
居是國也一國賴之鄭公名鄉公超成市極其致弭  
裁却亂光照四封紀在簡策若乃修立廢墜詔之以  
儀型筭可傳述則先民之澤于鄉國尤章章者也邑  
之有志較國之史則稍狹較家之譜牒則已廣國無  
史則是非不立家無譜牒則統系勿昭邑志之重從  
同然史有專官譜牒責之宗子皆有所不容諉者而  
邑志獨異如良之志荒墜百餘年旣燬而僅存亦有

足慨者矣蓋才之不文莫余若吏之不敏莫余若簿  
書期會拮据鞅掌且懼有缺事然猶勿敢讓焉者將  
使載筆之君子顧而思之思夫邑志之不容諉猶夫  
國之史家之譜牒也則繼此而修吾遺軼亦何忍置  
之百年哉憊矣吾良自故明隆萬時邑大夫告民勞  
呼將伯詳在舊志流極至今雖

皇朝

更化二紀間生聚勞來日不暇給且國之大事惟賦  
與役吾土受補定州疲民收債往返千里仰給公上

良鄉縣志

卷八藝文志

序

十三

而定之工于逋者尙賴我公祖父母加意調劑至若  
常役之外因郵舍之圯使輶旁午館於民之奧阼菱  
芻供億蕩析悲號是一邑之賦役較萬國之租庸調  
倍當其劇也使爲政者風聽臚傳思所以善其後則  
疾苦之緩急修救之源流非志無以詳矣抑良之爲  
俗士僕女侗節義忠貞炳然竹冊富穀之權在上觀  
感之事在下吾能無厚望也耶邑雖蕞爾乎竇諫議  
之嘉德樂將軍之偉烈邱壘在焉修身慕義至誠感

神用世顯於邦家若諫議父子足以爲樂善者之勸  
天下豪傑之士來遊京國登望郭隗之臺感燕昭之  
餘風退而弔望諸君之墓必且有慨然自奮於功名  
之會者而况吾邑人也

捐藏書籍序

儒學教諭李維翰

良邑爲

畿輔首區旗民錯處凡士庶家子弟之秀良者多不以學業爲急務以故每過歲科童子試恆寥寥其人至棘闈大試比科以來復無一人入彀豈昔有竇氏而今則絕其響耶抑亦造就者未得其道耳余不佞未嘗學問謬叨秉鐸竊見文教未興士功顯廢心且殷憂焉因思講習討論運舟之楫也詩書典籍載道之良鄉縣志

卷八藝文志 序

十四

舟也若止日夕聚集講堂共勉文藝而無詩書典籍存證其言是猶運楫而無載道之舟徒滋空言則烏乎可余旣待罪是邑敢不廣集書籍以公同好况黌宮規制例有尊經閣數楹藏書茲良邑學內雖草荆未備余謹將諸書列目櫃緘凡諸生會藝之日相聚間觀永存無失儻獲紬繹奧義造詣大家則秋薦春榮奪標會狀在昔燕山之竇氏豈不紹美於今日也哉爰序數言用誌不朽

報燕惠王書

樂毅

臣不佞不能奉承王命以順左右之心恐傷先王之明有害足下之義故逃遁走趙今足下使人數之以罪臣恐侍御者不察先王所以畜幸臣之理又不白臣之所以事先王之心故敢以書對極聞賢聖之君不以祿私親其功多者賞之其能當者處之故察能而授官者成功之君也論行而結交者立名之士也臣觀先王之舉也見有高世主之心故假節于魏以

良鄉縣志

卷八藝文志

書

六

身得察于燕先王過舉厠之賓客之中立之羣臣之上不謀父兄以爲亞卿臣竊不自知自以爲奉令承教可幸無罪故受令而不辭先王命之曰我有積怨深怒于齊不量輕弱而欲以齊爲事臣曰夫齊霸國之餘業而長勝之遺事也練於甲兵習于戰攻王若欲伐之必與天下圖之與天下圖之莫若結于趙且又淮北宋地楚衛之所欲也趙若許而約四國攻之齊可大破也先王以爲然具符節南使臣於趙比反



命起兵擊齊以天之道先王之靈河北之地隨先王而舉之濟上濟上之軍受命擊齊大敗齊人輕卒銳兵長驅入國齊王遁而走莒僅以身免珠玉財寶車甲珍器盡收入於燕齊器設于甯臺大呂陳於元英故鼎反乎磨室薊邱之植植於汶篁自五霸以來功未有及先王者也先王以爲慊于志故裂地而封之使得比小國諸侯臣竊不自知自以爲奉命承教可幸無罪是以受命不辭臣聞賢聖之君功立而不廢

故著于春秋蚤知之士名成而不毀故稱于後世若先王之報怨雪恥平萬乘之疆國收八百歲之積蓄及至棄羣臣之日餘教未衰執政任事之臣修法令慎庶孽施及乎萌隸皆可以教後世臣聞之善作者不必善成善始者不必善終昔伍子胥說聽于闔閭而吳王遠迹至郢夫差弗是也賜之鴟夷而浮之江吳王不悟先論之可以立功故沉子胥而不悔子胥不蚤見主之不同量是以至于入江而不化夫免身

立功以明先王之迹臣之上計也離毀辱之誹謗墮  
先王之名臣之所大恐也臨不測之罪以幸爲利義  
之所不敢出也臣聞古之君子交絕不出惡聲忠臣  
去國不潔其名雖不佞數奉教於君子矣恐侍御者  
之親左右之說不察疏遠之行故敢獻書以聞惟君  
王之留意焉

與司空羅公書

邑人張璟

雲司共事獲益孔多爲德爲民素懷胥鑒邇者楚省廢藩宮殿因材堪梁棟木中準繩勒期運京原未擇其水與陸也今奉行不善盛夏農忙驅民肩運聯袂揮汗饑渴難觀兼以擁擠踐踏民殆不堪命焉更苦者往常接替在城今番接替在鄉往來更換之間六七日一次大木用夫百二名小木用夫六十名僱夫一日每名用銀貳錢五分以六日計之須費兩半矣

良鄉縣志

卷八藝文志

書

十九

且夫少木多非百姓所能徧給也以愚見揆之不善有五善亦有五併爲臚列惟執事急擇之一邪澣強呼之不善也軒轅製車取其負重致遠不徒貴人賤畜抑謂人弱畜強若一車載二木則三畜可代三百夫之勞其善一一拖泥帶水之不善也眾肩負木距地不過二尺且途多泥溝陷足難行何如輪轅高架三倍於斯之爲愈乎其善二一累足難行之不善也委官長解一木必用百二之夫一夫足立尺地左右

各夫六十並無六丈之六有受重疊稠密跬步難前  
不若車可長索前引也其善三一夫眾妨農之不善  
也夏耘秋收爲務正殷役夫千百成羣日荒如許之  
田若用百輛之車可省三萬之眾其善四一費多銷  
算之不善也一木用銀百八十兩百木用銀將萬八  
千兩矣銷算過浮竊難以奏

聞誠僱車一輛六七錢足用卽驛所錢糧亦可促辦其善

五不佞見聞旣真不敢緘默漢堂一面議咸謂用車爲

良鄉縣志

卷八藝文

書

子

便惟侯執事裁之

時漢司空朱公號右君杜公號振  
門楊公號雲嵐司陸公號吳州

楊母王孺人傳

郭秉聰右通政

王孺人者興州衛邑族也世居良鄉之七里店幼端淑聞忠孝節義事心切効慕長適雪堂楊公脫簪珥爲遊學費事舅姑恭謹處妯娌和睦撫族遺孤如子嫻戚貧乏必曲爲周給天性儉朴服飾不事華靡雪堂公登進士第官行人諫止武廟巡遊廷杖左遷孺人曰此臣道也及雪堂公爲侍御每有章奏必極力贊成嘉靖元年被登極恩詔封孺人雪堂公繼僉蜀

良鄉縣志

卷八藝文志

傳

三

泉以年荒賑饑過於勞瘁遂卒于官旅窶寂寞行李蕭條歸鄉教子以篤志紹芳爲勗伯仲叔三子俱膺歲薦責以勤廉服官恪遵庭訓故所至悉著循良聲季子及諸孫務學明農克繼先業越三年己巳孺人壽躋九袞神氣清爽步履康健四子八孫六曾一元諷日張筵設樂遶膝戲綵親賓咸集邑之令博州之武帥皆曰此盛世人瑞也錦軸瑤章登堂獻爵爲孺人壽宗黨稱榮焉夫孺人以茂德享遐齡而允嗣之

盛爵祿之隆皆世所罕覩可以範俗垂休矣此邦家  
之光非一門之榮也余有感焉乃爲之傳

張金吾樂菴張鴻臚和菴兩公合傳

莊應會蜀藩司

初近臺公娶於陳多男子其仲任金吾諱鑽樂菴其別號也既長悃幅沉勇補黑衣衛東宮時寵王未就藩母妃之宗戚貴游潛有奪嫡之萌一日壯士杖挺擊闕而入意犯東宮眾皆駭愕不知所爲金吾奪臂格執之錄功進錦衣衛昭信校尉母弟諱鎔號和菴美丰容談論驚四筵自王公至韋布爭得納交焉宅

良鄉縣志

卷八藝文志

傳

三

近長安九州冠蓋過而問者卽投轄閉閣緇衣瓊玖不一而足殆終身如一日嗟嗟劇孟鄭莊者流也世之玉帛驕人與怯悞首鼠厭糠覈隱閨竇力不能定天下之業俠不足迴長者之車其可一二更僕獨安得納此鉗錘拔去毛髮哉陳氏之元季二公有焉

張贈君哲吾公傳

莊應會

公爲次菴公冢嗣恫先人蚤世未竟其用遂領家督祖宗之堂構惴惴承之內聯族姓外繼交遊雖門如萬石終不敢登枝捐本問耕於奴問織於婢無昕夕黽勉求之大小勿慢允益蕃費益滋勤益甚奉以不假之天年不匱之民生約其居處周于故舊僂俯循墻或敢侮予孝友夙成事諸父接昆弟雍熙之軌大邱家範亦若是則已矣厯敦義共金爨迄公指盈千

良鄉縣志

卷八藝文志

傳

三

羣從勸之析公悽其曰讓梨共被爲日久矣吾家累世同居者唐宋美談及余身而鮮令德爲父兄伯季憂其何以對先人強而後可度室數區皆心計目營更諸爽塏榱桷終不異巷寸木塊石一如堅緻羣享其逸獨任其劬室中器用財賂各適所欲自取苦窳焉宜無間然矣歲饑三輔洶洶殍者相藉也顧蓄積於物絕意贏糶大賑于國昕日作粥百斛凡五六月不聞嗟來之呼蒙袂蟻附先是民已傷驟得甘糜如



啖梁肉有斃于箸下者輒葦席以瘞所全活不可億計當事褒異表其庭瞿然勿居也甘泉烽火議兵議餉縣宰束手徬徨公投袂曰吾公執干戈以衛社稷與子同仇義也而嗛嗛者不可以報國卽運米千石芻萬束乞乞干城良實賴之性雅讓時衡宇贈君方稱間諸急公好義必以名歸之人浮其厚游辟雍四十年出入慎飭造次必於儒者旣老事從父如父母贈君宴客夜中伺其寢迺卽安甚寒暑不易燕居危

良鄉縣志

卷八藝文志

傳

三

坐如對大賓口未嘗臧否人物中清外和吐茹勸懲間無捍格有寯爲刑罰所加毋爲陳君所短之化云

成實徵光生傳

訓導郝錫疇

卿大夫鄉先生有嘉言懿行堪爲坊表者文人每樂爲之傳顧一人獨傳之不若衆人共傳之善乎南拜村人之公述行狀也曰武生成二先生邑之南拜村人諡得名號實徵吾鄉善士也秉心仁厚事親孝人言無間尤嘖嘖於宗族之口夫安常處順奉養無難惟至久病則牀前無孝子矣其老翁在世嘗病卧數年先生不脫冠帶而養煮粥煎藥必身親其事數年

良鄉縣志

卷八藝文志

傳

三

之中有戚容絕無怠氣嘗自勵曰養兒防備老此其時也老翁故後惟母命是從有二姊其夫家皆先富後貧母氏深以爲憂先生則仰承意旨爲之置田產謀生理使二家皆至小康二姊皆早世先生又撫恤諸甥諸甥女爲之婚嫁其克慰母心有如此者世爲農家生平以農爲務凡耕耘播種無一不精其事春夏之時田家作苦雖老猶常爲眾人示法至和睦鄉黨尤有爲人所不爲能人所不能者平時以誠相與

耨鋤無德色箕帚無諄語不待言矣尤可述者同治十年大水爲災一村之中或房屋倒塌棲身無所或米麥漂沒餬口無資統計男女不下百餘口先生皆招致於家妥爲安置而家鮮素儲無以爲養出新收禾麥未經過碾者設法作食以養之越數十日水勢平始令散去比其終也村中無男女老幼皆撫柩哀號聲聞於野知其感人深矣鄉人公述先生行狀如此時余秉筆志館卽以此爲先生傳

良鄉縣創修城隍廟碑

景泰七年立

失名

順天府所隸縣曰良鄉去京師西南七十里爲萬方朝會陸道輻輳之衝煩且劇視他縣倍蓰縣西南隅舊有城隍廟在焉景泰二年因始築城而廟乃隔於城之外縣大夫及民庶有事廟下者咸謂不便且地勢庫隘棟宇傾頽所以妥奉神靈者亦弗稱焉諸官僚酌應紛紜殆無虛日雖欲修葺移徙莫或遑也潯陽鄭公智來爲主簿焦神勞力以佐庶務方欲銳然

良鄉縣志

卷八藝文志

碑文

三

經理深慮勞民費財乃謀於知縣賈禿縣丞馬驥李謙典史陳永通曰竊聞政之體在治民事神而已吾儕神所當事者莫要於城隍也凡祀社稷山川雷雨皆以城隍爲配水旱疾疫禱禳皆以城隍爲先而其廟置於城之外無乃不可乎賈公然之馬李諸公佐之爰擇地於城內之乾隅袤廣計之總若干尋尺先捐己俸爲之倡好善樂施者翕然傾助遂市材取礪召匠僦傭建正殿寢殿翼兩廡外爲重門以顯巍翼

凡二十有六神之像設雕塑藻繪煥然聿新他若周垣修術器物之需罔不畢備興役於景泰六年二月二十五日而以七年九月望日收工始終効勞蓋主簿公居多而厥配王氏亦脫其簪珥於廟左右建九天衛房聖母及蚺蚘神堂各一縣之耆老吏民僉謂廟之凋弊已甚而鼎新實肇於今匪礪石登載何以垂示來者乃請余爲之記余惟自昔建郡邑者必依險以爲固地之險山川邱陵是也故或因山與邱陵以爲城若平地則壘土築城以擬乎山之險焉或因川以爲隍若燥地則掘土浚隍以擬乎川之險焉考之禮經無祀城隍之文然古者山林川澤邱陵墳衍防庸莫不載諸祀典況乎高城深隍以捍寇敵以衛人民其功甚大而可弗祀之哉今郡縣各有城隍廟是卽所謂禮雖先王未之有而有以義起之者也廟在良鄉者適當仍歲水旱之餘帑藏空虛之日而能大其規制役不勞民則鄭公有爲之才過于人也槩

可見矣庸次第書之俾刻石昭示焉施錢與助者之名氏具列於石陰茲不贅

創修良鄉縣西門甕城碑萬曆年立楊守魯

良邑舊無城隆慶初貴陽安邑侯始城之城有四門皆設重關以爲固故必有甕城焉方城之時東南北三門皆完西門獨缺垂二十年濟陽王公至始完之公以才能自香河移治茲邑務在修廢蠲弊與民更始嘗巡城至西方凭堞顧瞻者久之乃外指山原而詢父老曰山水時漲此門得無患乎對曰水至則灌溢而人君侯之牀遷顧城中而謂父老曰是門也於

良鄉縣志

卷八藝文志

碑文

三

縣治察院獨不邇乎匪直虞心庫獄卽賓至而徵關尹其何說之詞彼大者且城矣奚爲獨弗竟此也父老曰南東二關冠蓋必出之途飾之以爲觀美而加以將迎脯資之勤則足以追譴訶而冀有譽斯固非所及者公太息曰非我誰其完此吾捐俸以爲資僚屬効力庶幾其辦之哉爰鳩工庀材授二尹張君以素而使董其役畚揭方具士民爭相謂曰吾父母獨爲邑完西門微獨嚴於縣治而防水衝吾儕亦可以

安枕矣民競釋耰鋤而赴工學士大夫咸遣丁壯從事縣著姓之尙義者更饒出夫至數十百名公悉勞來之乃爲戒於眾曰若獨無私事乎吾不忍久以吾事勞爾也戶出役三日卽休無復更事民咲相語曰爲吾良完城而侯自以爲事可謂無間形骸於我也何忍輟此而去於是至者日益眾張君戴星出入勞苦於版榦之間登登馮馮甫閱月而工告訖矣墉厚二丈八尺高三丈六尺表三十餘丈鍵闔雉堞咸具煥然甲於他門而爲完城焉公名道定號懷田濟陽人張君名滾號蒙泉亦山東人



重修良鄉縣署碑

正德元年立

劉武臣撰

刑部主事

良鄉古燕中都地今爲畿第一劇縣路控東西南三方內外大小臣工之宣納詔令者稟承職事者朝者賀者往返必信宿焉將迎無虛日令以下若丞若簿若典史皆分屬諸路以候及暮始歸秉燭視事無幾文移山積於前命吏抽檢取其利害之尤切且近者料理而已帑藏竭於供餽車徒困於奔馳民不能支至轉徙他郡若是者皆不暇問也而況于縣署乎良

良鄉縣志

卷八藝文志

碑文

三

鄉縣署正統中前令王君實建之迄今餘六十寒暑日就敝陋令于茲者非不欲新之也皆坐劇不能耳孟君德厚以鄉進士來令茲縣歎曰此亦天子輦轂之下而縣署乃爾豈所以壯京師示多方哉雖然當先其急者遂銳然抑豪強去奸宄祛弊蠹雪冤滯賑窮乏未幾竭者足困者起轉徙者還四境之內協然大治乃撤縣署而新之自瓦磚鍛礪以及竹木凡營構所需者如取諸左右然羣匠皆駭愕相顧以爲異

蓋君自履任來已屬心于此官府有羨輒儲之而人  
不及知也工凡九閱月而完總若干楹宇其高翼翼  
其整炳炳其黝堊加於舊規信數倍不啻矣始縣署  
之未新也士民懼其將厲矣頗以爲念至是懼甚益  
德君謀勒石圖不朽且以爲將來者勸

重修良鄉學宮碑

順治十年立

翰林院編修

李昌垣

皇帝中乂之九載壬辰躬詣辟雖行釋奠

先師禮進更老饋餉致祝說經義於時褒錫諸儒臣博士弟子儀甚厚蓋曰惟后綏猷勸學迪誼洽聞興道以京輦倡函夏其爾郡縣守令廣厲學宮之意咸視朕夫風指所屆近者先承良邑雖彈丸乎于京輦則腋及之其地較漢之三輔稱扶風馮翊者甚密重其人誦法孔子敦說詩書于文學其天性然也又炙

良鄉縣志

卷八藝文志

碑文

三

天子之化朝施而日中徧焉為牖孔易故良居衢塗為衝

首車書四達罔不由之先是官茲邑者督戈及飭廚傳吏卒緣南北界鄣望冠蓋令負帑驅道左疲於輪蹄年會問甚者星飯具櫛家而催呼踵簿案訟獄董稽旬考不暇理苟辦一切取支給已爾遑問廣厲為以故子衿不嗣學宮鞠茂草云邑侯張公如蒞謂簿案訟獄董稽旬考猥務耳迎送徵歛吏之俗者安與詩書事乃數謁

先師廟肄雅課士曰

聖主右文過高光甚高帝謾罵儒生以馬上得天下安事  
詩書及其過魯命以太牢祀孔子光武投戈講藝息  
馬論道晚乃備三雍今

上英齡幸學其風天下郡縣振陶雋彥起衰扶墜甚深且  
篤予承京輦地爲部縣先卽不能如翟圃趙熹之議  
復太學堂房門館助流盛業及文翁韓愈常衮之徒  
設鄉校廣禮讓孝義於殊方願覩泮水之鞠茂忽諸  
良鄉縣志

卷八藝文志

碑文

三

爰出厯俸鳩工庀材闔邑輸作恐後庶祊殿寢祠樓  
庠漏櫺枿甃磧朱紺雕鏤塙堊聖髹絢具甚自是學宮  
璀璨倍曩時眾以功侯侯曰吾觀前吏所載講堂荆  
棘自闢爲是聖道復昌之象桓帝末太學門自壞襄  
楷嘆謂斯文不振徵此由是言之廟之修廢教之崇  
替也吾吏近

畿遵

右文紹廣厲度不至如前之取辦一切置學校不務者因

爲鼎新于予之志之職允協于邊功邑之人則以侯  
之賦徭清簡字氓造俊卹羸剷暴政無不觀厥成也  
其甚者煥聖宇而裨

帝治厥惟顯哉以質子曰如邑人言侯于中父之道尊  
先師之旨甚得厥惟顯哉公諱士彪遼陽人戊子夏筮仕  
癸巳春遷靖州牧人重之比于名教干城焉

新建魁樓碑

康熙十年立

前令李慶祖

辛亥仲秋余補良令謁

廟畢週視費序見魁樓傾圮且迫近宮墻兼失位次厥法  
弗善何取焉詢諸博士弟子員僉曰此魁樓自建迄  
今一無裨益鋒挫氣折見睨于有司者三十年嗣後  
蜀省吳侯建魁樓于城頭巽隅非不文峰高聳光聯  
奎壁取中若攜然而面向東南日送去水雖應運而  
興者有人其於勳猷事業猶恐未盡善也語曰琴瑟  
良鄉縣志

卷八藝文志

碑文

三

不調則改絃而更張之此其時乎昔文翁治蜀首先  
學政而絃誦比于鄒魯甯武子令餘杭振起膠庠而  
中興侈爲美談況

畿南首善之區輦轂咽喉之地可聽其沉淪而不鼓舞  
振作之乎爰同邑之紳士揆日測晷卜吉於學外東  
南高平之原創建新閣其近宮牆者去之峙城隍者  
聽之璧取其舊材庀其新丹鬆礮礎綜理精詳高舉  
文巒坐障逝者之波用挹斜飛之巽水太乙俯矚面

納催官之曜遙聯峻秀之辛峯功肇於壬子暮春落成於本年秋孟青碧輝煌軒窗洞闢樓閣橫空清風直入視昔稱偉麗焉時偕學博郝君邑佐陳君等割牲酌酒展禮於下復揖諸生而進之曰天之所佑者善也主司之所衡者文也神之所効靈者順也人事盡于下天時應于上互相脗合而始孕靈毓秀發祥而呈瑞也若以跣跣之才惰窳之器悠謬荒唐躐駕奔湍之文而援神以助以幾倖于萬一此必不得之良鄉縣志

卷八藝文志

碑文

三

數也方今

聖天子廣厲學宮

勅各省學臣合寓內郡縣各拔其尤以充辟雍之選正斯文隆盛多士競奮之時也邑雖蕞爾乎圈撥之餘不廢禮樂衝罷之末尙事詩書矧余作人之念素慙思皇之士蔚起識雖固陋誠有一得之愚寧忍吝之而不見之實事乎猶之多士具垂天之翼吾爲積之風使厚焉而已多士操萬斛之舟吾爲積之水使深焉

而已將見扶搖盪漾事相際而有成也余也何敢貪  
天之功以盡爲己力焉多士其勉之是爲記

良鄉縣志

卷八藝文志

碑文

罕



新建琉璃河橋碑

嘉靖  
年立

前明工  
部尚書雷

禮

良鄉縣迤南四十里村名劉李其地窪下爲積流所  
瀦有河一道志稱琉璃卽古聖水自房山縣龍泉峪  
諸泉會合於此經霸州東注拒馬河入海時逢霖潦  
散漫奔潰百餘里凡陸輓跣馳者動阻滯不能涉甚  
或四方驛輳坐視愆期嘉靖乙亥皇上駕幸承天覩  
民艱涉惻然憫之比鑿回勅工部尚書臣甘爲霖督  
修爲霖以病去不終其事越歲乙巳復命侍郎臣楊

良鄉縣志

卷八藝文志

碑文

三

麒內官監太監臣陳準袁亨建石橋普濟各以績敘  
然無隄捍禦每遇溽暑水發環橋南北盡爲巨河難  
以越渡往來病是者又閱八年矣會辛酉仲冬事聞  
當依蒙諭尙書徐杲曰良鄉河橋屢勅大臣督理水  
勢漲未見東下茲降帑銀八萬兩爾總理之勿令外  
知恐民費財也杲受命相度建議修築二隄專用條  
石中添小橋一座并設水溝以殺水勢其各漲丈尺  
數目畫圖貼說以進臣杲曰皇上體上天大德利濟

元元吾輩職司橋梁道路不能先事弭患致厯聖懷  
責實難辭况部庫所儲分毫皆皇上財也敢煩帑藏  
具疏請任事荷旨俞允於是委郎中臣王尙直員外  
郎臣魯一經同內官監太監臣楊用分理其規畫悉  
臣臬所定凡爲隄南北東西共長五百餘丈橋一座  
長四丈五寸濶三丈五尺高一丈三尺五寸水溝八  
道又親飭欽立元恩咸濟坊凡二座至壬戌孟冬報  
成上遣臣徐臬懸匾祭謝差溥資有差於是臣臬立

良鄉縣志

卷八藝文志

碑文

三

石屬臣禮頌述聖德垂示永久竊維萬古稱盛治莫  
過於堯舜史臣稱其仁如天其德好生者以心存溥  
濟不忍一夫一區咨墊而已而橋梁道路尤爲王政  
所急今我皇福民利濟常存心於天下至誠懇切如  
元德包涵故一聞民之病涉有如已實溺之不容以  
自己者其所以發帑藏普福祿不欲勞民費財真昭  
格乎窮昊之表與堯舜同一揆矣卽今石隄延袤與  
橋相連縈若橫帶使萬國輻輳而至澤及商旅農氓

相與歌忭於途謳溢於野不與平成之績萬世同其  
煒煌耶是役也臣禮不過祇奉德意率舉職事諸臣  
臬之調度區畫實能爲九重分憂播之無疆不徒隨  
事効能而已因記其顛末以告來者

護國大善弘恩寺碑

前明天啟  
壬戌年建

吏部  
王舜鼎撰

神宗皇帝以仁孝膺久歷魁柄在握紀綱修明禮樂  
洽康之餘留神內典奉慈聖太后命閱勅佛宮以崇  
像教其微旨蓋以扶王政而膏箝窳儼然二祖並垂  
二氏之家法也豈漢唐中主惑幻說導侈心以標天  
下從邪之路而儒術浸微者乎去城都之西南良鄉  
縣屬地曰舊店薄海朝宗輪蹄之所輻輳萬曆壬寅  
歲漢經厰掌壇舊都府管事御馬監太監楊君用目

良鄉縣志

卷八藝文志

碑文

四

屬此地堪爲主上布福田遂結草陶瓦令緇流以蓋  
茗杓水濟蔭炎湯已爲叢林之權輿矣延至乙巳有  
昭陵神宮監太監趙君良漢經厰掌壇御馬監太監  
盧君永壽張君然皆楊君用名下也續恢善緣具疏  
上聞神宗皇帝孝定國母欽施帑金虔造大雄天王  
伽藍祖師三大士等殿藏經閣鐘鼓樓山門廚茶庫  
司等房外有十方施茶捨藥左有靜室崇樓雜糧等  
堂庫殿閣內安供有釋迦佛之大士大悲千手千眼

等佛佛像皆添金像也週圍有果園菜園石築墻垣樹株約千餘棵至庚戌年欽賜佛大藏經及諸品佛經仍賜千佛袈裟鐘磬彩幡仍結華嚴社會募眾壇師歛金置供具十方香燈及贍給眾僧地畝若干項寺之西北建有普同塔備十方遷化者是役也經始于萬曆丁未年月日落成千萬曆丁巳年月日蓋上承國母之主之德庇下藉趙盧張三公並司禮監各衙門太監等官之善緣洎諸善信之至心皈依者以

成此一大因緣夫出世之旨不有其身安有子孫昔百丈愍律居之廩而創立清規至一針一草一椽一瓦皆以普心垂後後之人當體此意非十方有德爲眾所推服者不得主此三公之念以振迷拔俗其子孫並不許干涉並不得私以意立其所善之緇流行將與百丈永垂不朽矣今新天子仁孝光闡前烈紀綱禮樂文明以治卽不必究心佛乘其所扶王政膏瘠窶者甯有已哉是爲記

重修壽因寺碑

康熙六十一年建

國家久道化成河清海晏

皇上于萬幾餘間時巡

畿甸所以修武事者省耕歛而無逸也道路經過遇有  
招提洞府間亦流覽憩息或命修造錫名懸額以爲  
民祈福凡大小叢林得邀

宸翰則萬眾觀瞻遠近輻輳壇場香火爲之益勝良鄉縣

北古十方院肇自明時歷有年所棟宇傾頽丹青漫

良鄉縣志

卷八藝文志

碑文

吳

渙庚子春

駕過此捐貲重修爲

皇帝祝釐康熙六十一年壬寅三月朔落成蒙

賜書匾額殿曰花臺止水大悲檀曰大悲慈航易院爲

寺曰壽因

天章璀璨鳳舞龍飛佛日增輝宗風丕振於以祝

皇圖之鞏固綿

聖歷于萬年廣祇樹之福因登斯民于仁壽者庶其有助

歟

良鄉縣志

卷八藝文志

碑文

四七

曹母王孺人捐置學田碑

知良鄉  
縣事張習撰

堯舜禹湯文武周公之道亘億千百年而燦若日  
星昭如雲漢顯然於鐘鼓俎豆之上而未嘗少變何  
則蓋利每輕於君子而義亦重於鄉人鄉人趨利如  
鶩烏覩鐘鼓俎豆之盛者卽所謂堯舜禹湯文武周  
公之道留於億千百年之後者哉或見君子之所爲  
大義之所在莫不欣喜而樂道之於斯見是非之猶  
在人心而大道至今未墜也良邑地當孔道駟傳倥  
偬戊戌之秋來蒞茲土恭謁

良鄉縣志

卷八藝文志

碑文

哭

文廟後未暇拭風塵而絃誦之間閱文卷得武生曹大  
成之母王孺人願徹己產爲置學田以備丹雘廡宇  
及兩學師講習之資旣以鳴於前任陸君奉  
憲批而未卽行也余慨然曰此卽君子之義舉哉不  
爲之記勒諸石何以垂不朽且無以鼓舞鄉人使知  
大道有在也嗚呼非財之難有財而善用其財實難  
善用者非難善用而出於巾幗者則尤難且夫閨闈



之中耳不聞千百十年之言目不覩鐘鼓俎豆之設  
一旦舍利取義爲之子者善承意旨而卽以鳴之官  
則其在家庭間又將何如也若孺人與其子雖未悟  
堯舜禹湯文武周公之道抑不得爲鄉人中之君子  
乎哉 乾隆四十年立石

新建挾河中橋碑

同治十二年建

知涿州事

周紹達撰

挾河亦曰俠河一名夾河有二源一出房山縣西南上方山諸溪澗名灌河一出房山縣西南白玉塘與灌河合曰夾河舊志所謂挾活河者是地當涿良房接壤

畿輔往來大道向有濟渡石橋前明州郡王將軍鐘所建年遠沙淤同治八年三州縣官紳集資修濬碑載其事不數年水徙而北舊橋幾於虛設十一年署良良鄉縣志

卷八藝文志

碑文

辛

師兼尹萬公自

西陵將事回道經此地惜前工未竟其勢欲就新橋南設橋

座與南北兩橋相屬俾水各就所趨無蕩決患捐俸二百金囑紹達與知良鄉縣事王君會同房山令張君協力勘辦購材興工選派紳董分理之接石橋爲涵洞四閱三月而告竣是役也不費

國帑不取民貲計虹身雁翅及兩岸鱗比石砌並南北  
之兩橋欹者正之塞者濬之共經費一千八百餘金  
除吾 師倡捐外諸寅好踴躍繼輸適新任涿牧錢  
君來足成其數從茲砥平軌順屹然與涿之永濟良  
之飛虹並稱利涉者皆吾師力也亦各寅好體吾  
師之心爲心也會橋事竣而余亦卸州篆爰敘顛末  
勒之貞珉庶官斯土者以時修補無失徒杠輿梁之  
意也夫

奉政大夫四川按察司僉事雪堂楊公墓志銘

王用賓

四川按察司僉事楊公於嘉靖八年己丑二月二十五日歿於泉邸其子守正聞訃哀經請余曰哀哉吾父已矣茲惟有墓銘以慰諸幽敢圖之執事余惟公昔與家君同舉進士官內臺誼至厚也惡可辭公諱秦字濟之別號雪堂其先爲山西潞城縣人洪武

始祖以軍功授潞州衛百戶高祖繼襲遂改隸興州

良鄉縣志

卷八藝文志

志銘

三

中屯衛焉曾祖信祖勇河南湯陰縣主簿父琛以公貴贈監察御史母宗氏贈太孺人公生而英敏端慤不妄笑語爲兒時父問之曰女志何如我欲爲御史父奇之乃遣就學讀書卽曉大義長爲弟子員弟子員皆勿公若也正德庚午領順天鄉薦丁丑登進士第己卯除行人同行人時武宗毅皇帝南巡命下公率同列抗疏諫立謫除國子監學正公在國學嚴而以禮勤而有方爲諸子敬服居無何以御極詔復公

官擢福建道監察御史公正色在言彈劾弗少避其  
奉勅陝西清戎也刈慝植良獎恬抑競昭貞烈讞疑  
獄民用大悅先是抽丁補伍輒復散亡公曰是貧所  
致耳迺察其殷富者使厚遺之貪吏冒逃卒以私餉  
者歲逾數千石公稽諸邊籍得其情俾悉償焉自是  
軍實用豐餉不悖出矣上以公爲可用仍勅兼覈戎  
器公以爲工居肆則藝精物有軌則費省迺奏于其  
率諸鎮建局除器而以時出納之時少師石琮楊公

良鄉縣志

卷八藝文志

志銘主

三

總制邊務一日過陝講武病其器敝公令悉易之石  
琮公嘉曰我軍固有恃哉己酉還朝公攝四道事有  
囚當死託鄉人以千金賂之公叱之曰我知其法耳  
而不知其賂自是疏之明日遂辭病弗出丙戌春進  
陞擢用督理三川屯岷公至杜奸商之弊墾山谿之  
田編氓德之乙平廣安之寇時臬司諸公遷除勿至  
事多停委咸暫攝之獄無滯囚案無留贖當道者交  
章奏聞戊子蜀大饑廷議命藩臬二人賑濟皆曰生

楊僉事不可乃周歷郡縣區處咸宜凡數月力憊而疾竟不起春秋四十有八距生之辰實成化壬寅七月七日也於戲公有致遠之才而弗克究其施有濟眾之仁而弗獲享其壽昊天不弔咨痛何及惜哉公平生以不逮養親爲恨每登第泣然涕泣事叔樂耕翁情禮咸備兄泰歿鞠孤事寡逾于平日蓋其天性孝友如此然待人處已絕無驕吝爲詩文多奇思有迺巡集十卷配王氏封孺人宣慈惠和公多賴焉子

良鄉縣志

卷八藝文志

志銘

番

四人長守正次守直守公守義孫男女二人諸子皆好學能自樹立君子謂雪堂公不死矣其葬是年十月日墓在良鄉舊店西三里祖塋銘曰奕奕楊公肇自晉衍世濟其武公以文顯惟公之生履直秉貞始非諫官世以諫名繼登臺憲風裁凝肅孰謂埋輪豺狐斯伏秦山有華蜀江有岷溟滂巖業允哉公仁仁胡勿壽我心孔疚勿於其躬必於其後壽非在齡惟名惟德於萬斯年視此銘刻

守朴趙公墓志銘

楊維聰

嘉靖丙辰夏六月乙巳守朴先生卒於山丹衛先是  
公爲兵部尙書論者斥其進爲逆鸞所引謫戍山丹  
旣卒柩還其鄉將以丁巳春三月庚申葬于良鄉北  
郊太平莊之原從先兆也墓宜有銘當得王公大人  
之筆以爲之重而罪廢之餘禮主其減謂維聰少嘗  
相知仕嘗同僚且有姻親之好公弟國子生金來授  
簡焉義不可辭乃撮其大者如左公諱錦字文卿守  
良鄉縣志

卷八藝文志 志銘

五

朴其別號也先世太平當塗人高祖華玉曾祖永安  
居采石祖通以例北徙今爲良鄉人考宣號義菴祖  
父俱以公貴贈大中大夫山西布政司右參政祖母  
李氏贈淑人妣任氏封太淑人生二子公其伯也幼  
而好學蚤著文譽嘗隨後渠崔公月湖楊公游月湖  
公以薛文清公讀書錄授之自是潛心理學舉正德  
癸丑鄉試登丁丑進士授南京戶部浙江主事公可  
揚州鈔關鑄銅爲櫃竅而鑰之所入旣多則銷以儲

庫人不得而爲私焉又創水竇于關梁之南小舟可  
經出入得以免稅迄今便之陞署郎中調南京吏部  
稽勳司郎中入爲兵部武庫司郎中改武選司職方  
司郎中大同軍變戶部侍郎永年胡公奉命往平之  
奏公爲佐歸掌職方事凡將領之賢否邊塞之險平  
糧儲之充耗皆備訪而默識之有所施行無不允愜  
大司馬倚重焉由是趙郎中之名譁于人口繼爲大  
司馬疏言其專復出爲南京戶部河南司郎中陞溫

良鄉縣志

卷八藝文志

志銘

五

州府知府山東按察司副使山西右叅政浙江按察  
使擢右僉都御史巡撫延綏贊理軍務道聞太夫人  
之喪而歸服闋改大同有忌之者論其不可用冢宰  
力稱其賢上竟用之總帥周尙文者老將也不事掎  
克得軍士心而果於自用性多偏執公以體國爲念  
不憚屈己與之交歡然遇不可者必盡忠告周以爲  
怨慮且將誤事上疏求退改甘肅甘肅遠在西陲未  
幾考察巡撫公名爲所指罷居良鄉家居畧勢儉約



若寒素然憂時感事則每致身爲念門垣戶几多所  
題識公廣陵有別墅或勸之往公依依不忍曰昔人  
云窮達戀主耕桑近郊公之意蓋如此公旣不肯忘  
世世亦未肯釋公嘉靖庚戌春上用公爲廷議命下  
卽日單車就道兼程抵鎮弔死問疾恤孤掩骼蒐卒  
簡將不數月人心遂定上疏論兵機十六事久任夏  
官厯典邊鎮兵機政要閱厯有素事至立決無壅滯  
者晨興入部日晏方歸不以寒暑少廢司屬敬服軍

良鄉縣志

卷八藝文志

志銘

五

士感悅以功廕一子錦衣衛百戶加太子少保公在  
甘肅大同與仇鸞同事入京之後頗相乖忤過從咲  
語乃人情之不免者山丹之行惟悼臣道之不成仰  
聖恩之宏貸無幾微見于顏色嗚呼豈惟公哉蔡邕  
之於卓龜山之於京其不幸亦猶是也公爲人謙雖  
每事從厚尤友愛諸弟俸入之餘皆以委之別無私  
藏從弟金視之如同出以例爲國子生調恤宗族姻  
黨不惜勞費酷好經史閒居手不釋卷著論議若干

卷目錄若干卷詩文若干卷年六十有九配陳贈淑  
人繼配張封淑人女三長侯孺人所出適永清左衛  
指揮同知周佐次鄭孺人所出適維聰弟之子文稗  
固安庠生也次金孺人所出適同邑監生張維厚弟  
銳子二伯世官卽受廕者先公卒仲世錄邇嗣前廕  
公之行實其紀載具於國史稱述在於鄉評一介書  
生致位八座雖老而荷戈爲國殞命亦其願也孤魂  
萬里識與不識皆所痛惜而況如聰者哉

良鄉縣志

卷八藝文志

志銘

五

銘曰

於惟先生間氣之英藝苑挺秀理學研精芥拾青  
紫世網遂嬰郎署允閱藩臬薦更三典邊鎮再陟  
孤卿徊翔中外舍藏用行礪發利刃惟才之宏忠  
實貫日惟志之誠一德匪懈指天爲貞溘死流亡  
不怨不驚太平之莊鬱鬱佳城卿雲瑞靄耿耿常

橫

衡宇張公墓志銘

王無咎

順治戊子秋前朝封奉政大夫山東提刑按察司僉事張公考終正寢冢嗣候選縣尹君旣營葬事願幽石未備持狀稽顙問銘於余余與公喬梓爲道義交有年公生平大節亦惟余知甚悉非余其誰銘公者按狀公諱銓別號衡宇其先江南武進人也永樂間始祖太公從龍北上遂卜居于良邑之魯村數傳至尙賢有隱德以子鑽貴贈昭信校尉錦衣衛實授百

良鄉縣志

卷八藝文志

志銘

堯

戶是爲公父生七子二女公最少公幼而穎敏儼然有巨人之志初受博士家言以父兄早逝稱家督不獲成業歲丁未援例入太學辛酉考授鴻臚寺序班非公所好也公家世素封至公持以勤儉益開大之諸子孫旣眾教以正業延名宿爲之師崇禎改元長君以恩選入對旣而考中縣令公不使謁銓謂長君才堪大受曷小就爲丙子次君舉賢良謁選山東陽信縣令公勉之曰忠君愛民此日將見之行事矣壬

午冬陽信不守次君以死殉訃至家人痛問之公曰  
吾兒盡命報國得死所矣夫何憾以此見公之曉然  
于大節也卽奉旨褒恤次君贈僉憲公如其官歲甲

申

大清定鼎選任賢能有司重公德望數行徵聘公力辭不  
就曰堯舜在上亟宜攀鱗附翼奈暮年善病得爲太  
平民足矣所以養吾拙也易曰高尚其志非公之謂  
與丁亥冬戊子春連舉鄉飲大賓鄉人咸欽之羨之

良鄉縣志

卷八藝文志

志銘

卒

姪孫璟丙戌舉於鄉諸孫暨曾孫輩亦多入黌宮高  
列知公之德者咸謂積善宜昌今茲振興伊始行將  
益入厥門而公乃遽爾仙逝矣公生平質恪無矯揉  
不妄言咲而和氣益于其顏卽之如坐春風中也性  
孝友蚤失怙恃事諸兄嫂如父母諸兄歿撫姪猶子  
及孫曾日衍同居如故宗族鄉黨無間言自奉至儉  
素而于恤孤濟難助婚殯死諸事則罔不竭力厚施  
甲子歲里書張姓者有負于官至賣妾鬻子償之公

代爲完納使得復聚而絕口不道若惟恐人知者丙  
子兵變有甯得域郭世松等誤拾軍營遺牛兵官視  
爲奇貨所求不遂將殺之公出資以贖其死戊寅兵  
馬雲集食不克給公出穀五百石草二萬束有司列  
之奏章得旨給敘庚辰歲凶人相食公煮粥賑之頻  
年身犯兵劫而公盡力經理罔墜家聲其德之不可  
泯者如此銘曰孔懷是篤德之光樂善無懈性之良  
正直是好行之芳後人克昌澤之長厥石永藏千秋

九春楊公墓志銘

公諱之柄字栢梁號九春順天府良鄉人系自晉太傅叔譽食邑楊氏得姓歷漢唐宋代有顯者迨明有諱斌者晉之潞城人隨永樂北征遂家良鄉仕昭信校尉興州中屯衛百戶斌生信信生勇勇生琮琮生秦號雪堂正德丁丑進士奉政大夫四川僉憲前福建道監察御史諫南巡廷杖直聲振天下雪堂公生守直守直生尙文尙文生三聘卽公大父由歲進士

良鄉縣志

卷八藝文志

志銘

三

官兩當教諭博學有行義著有志道集行於世生公父纘先食諸生餼以公貴誥贈甯波府知府配劉氏贈恭人公以己卯順天鄉進士於甲申除稷山縣知縣陞刑部清吏司主事歷員外郎中陞甯波府知府卒于官公性直而通敏以厚處事一以是非爲斷不能處不易與之人使相感而化無間言然樂其坦懷不見矯異以及汎愛敦篤交友出于至誠雖心別賢

愚而博無涯涘不記過其天性然也爲文筆不加點  
滾滾而出無不疏宕適暢可喜其敏妙殆如其人山  
東黃公家瑞以舉子業名家令公邑一見嘆爲奇才  
黃文力追西漢少許可而獨心折公自以爲不及其  
後讞獄之文必成之邑侯嘗曰吾堂可無吏吾幕可  
無客亦可想見其概矣功令課諸吏文辭公獨喜援  
筆立就主者大悅服其文章馳騁皆此類若習煩劇  
應倉卒咄嗟立辨卽公亦有不自知其所至者甲申

良鄉縣志

卷八藝文志

志銘

奎

筮仕稷山令初下車聞前令某賢公慨然曰居官固  
當如此矣稷當疫病後公撫字甚周用以全力其大  
者請蠲荒地逋糧三萬餘兩減舊額之半編邑戶三  
十六里爲二十四里均役輪差以故賦薄徭輕民至  
今賴之甘棠之思勒貞珉不朽泄比部佐以輕典所  
全者居多曹郎例分覽章奏一字失簡則有堂責人  
多厭苦之公封繳獨先卽同官直日輒私託公公爲  
兀坐署中代閱之無倦容曰吾卽以此習勤且諳諸

故事不亦愈乎故其守甯波也凡六年精密宏達處  
盤錯如迎縷解如率下屬除吏弊裁差擾折訟獄懲  
豪猾塞私請繕橋梁餉兵賑荒弭盜之類不可更僕  
數其難尤在軍興舟山之役大師旁午時寮員俱乏  
諸備糗儲芟造舟治甲百務畢萃公身無足爲公困  
者公目矚耳聽口答手揮環中四應不病民而事舉  
濟甫暇又集俊髦多士校文藝鼓舞不衰所以名魁  
大元皆出公門人爭豔稱之尤不可及公初至郡時

良鄉縣志

卷八藝文志

志銘

齋

浙大吏風聞欲廉某命令公得其事公曰良令也不  
可大吏重傷公意又命別道監司示旨必欲廉其事  
公又曰不可令竟賴以全其持正不阿又如此嗟乎  
使入佐天子進退人才秉鈞補袞其裨益何如也庶  
幾哉古大臣之風矣惜也公才百未竟一而公卒卒  
之日城門卒若聞公呵殿而出者或云見公從騎入  
廟故公歿而民思之哭之哀易公祠爲廟歲時歌舞  
于前如公生焉事聞撫軍秦公悲悼甚卽爲入名宦



其公之志也歟撫軍檄云易簣之日人皆巷哭良爲實錄云公廉而好施予祿入咸分贍宗黨無私藏生平未嘗有苛刻之行而理所未可則確乎不拔毅然不敢犯溫恭如不勝至義氣自許慷慨又有過人者若公者吾真無間然矣公與余年友嫻親共賢書十入載公勤其官以歿余時方旬宣西魯未及執紼爲痛閱歲兩令嗣扶櫬來都謀葬事持狀丐余一言余素愧不文然知公之深莫余若誼何敢辭灑淚濡毫

良鄉縣志

卷八藝文志

志銘

奎

而亦豈能遂盡公之萬一也哉悲夫公生萬曆丙午九月初五日寅時卒順治丙申五月二十二日巳時得壽五十有一配孟氏累封恭人子三長于庭廩生娶江西建昌道李公赤城女次在庭庠生則娶子女也次華庭公遺腹側室李氏出孫男起泰開泰在庭出復泰于庭出孫女一亦在庭出皆幼葬于寶店之原爲之銘曰公之化古之類不知公謂公才邪以薄占之衰讀斯文如公來

楊烈婦墓表

道光十二年立

知良鄉縣事

李宣範

烈婦楊氏者良鄉縣民王志福之子同縣楊福亨之妻也世農業年十七歸於楊事舅姑無失禮舅楊玉歿後奉孀姑李孝養尤至既福亨以病卒烈婦誓以身殉終念姑年老無他子遺孤莊兒甫三歲乃忍死上事邁姑下撫弱息誠不忍令夫之有遺恨也父志福哀其年少失偶且家貧無所依活乃令之歸微以言論之烈婦不應志福又謀於其姑李李意允乃改

良鄉縣志

卷八藝文志

墓表

奕

擇人行有日矣烈婦給其父求歸祭夫墓父不疑也歸卽乘間自縊比人救之氣已絕死年二十九歲時道光七年四月也閱五年余奉檄攝縣事縣人以余之激揚名節也始以其狀聞且請刊石以紀嗚乎烈婦詎欲以烈顯哉烈婦不死於夫死之日其身本可以無死迨至其父其姑之意不可回非死不能明其志乃毅然死又不欲以已之死使人議及父與姑而從容乘間以死則其志尤足悲者嗚呼烈婦詎欲以

烈顯哉烈婦生農畝間未嘗讀書明大義非其天性  
貞亮有不可奪之志而能然乎哉乃系以銘曰  
赴死易撫孤難慷慨從容義則一烈婦雖死生烈氣  
此石可磨心不滅

固節驛

李嘉賓

良有固節驛云何得此名賢哉葛王妃挺挺女中嫵  
綱常泰山重一身鴻毛輕行矣死傳舍皎皎從一貞  
從容就義難確哉古人評女子見何真臨難處之亨  
奔命以存夫殺身而求誠擇術得中道寸心千古明  
烏祿得再世眾推帝東京人稱小堯舜境內樂昇平  
燕山有佳色燕水有餘清山高節不朽水遠流芳聲  
乾坤氣磊落驛名永以旌

良鄉縣志

卷八藝文志

詩

六

良鄉行

樊魏邑人

金臺西南七十里一塔寥寥紀燎崗襟喉南北當燕  
谷水似琉璃控霓虹各方朝彤闕千齡樂未央八蠻  
通道稱朝貢萬國款塞紛來王鮮芝來五嶽玉米走  
蘇常金磚與醮盞騫茗并魚缸西番載皮櫃南緬供  
象房中官絡繹馳丹轂侯伯新封就土疆肩輿常百  
計飛蓋總冠裳箱奩籠錦繡筴笥過邱岡武夫排道  
路塵埃蔽穹蒼錦衣照閭里玳筵誇故鄉朝營千戶

良鄉縣志

卷八藝文志

詩

六

宅暮置萬戶庄百年富貴如一日歌舞甯知春夜長  
吁嗟京城地盡是利名場更有皇華使驅馳日夜忙  
朝烽夕燧報聲息羽檄黃符催運糧縣官驛遞衝風  
雪滿頭鬚髮結冰霜迎送身勞苦做垢着冠裳一朝  
黃金盡身體被鞭傷挪移還惹罪需索倒私囊家家  
門巷皆深閉一邑官吏總逃亡午夜沿街索燈火關  
文掛號空徬徨過客咸嗔不應付可憐苦楚誰能嘗  
父竄霸州東子徙西山陽戶口六百丁魚遊釜中湯

孩提已編役衰老差還當一萬三千協濟數三分得  
一那賠償官錢私債頻年借前官後尹真淒涼寄語  
四方遊宦客選官切莫選良鄉

黑狗臺

君不見良鄉城南黑狗臺爲報主人身且埋野火延  
燒主人醉鹽溝水遠走千迴浥得水來沾近草惟恐  
王恭被火煨又不見王恭酒醒黑狗死始知延燒因  
狗止仰天號泣狗何辜防夜隨身將誰倚思量何以  
報狗勞爰築葬臺高百尺嗚呼狗因人養甘殺身人  
念狗勞意何真酬功恤死主人義食食分憂黑狗辛  
言官直諫不避刃邊將殪敵身野殪龍逢冒死報君

良鄉縣志

卷八藝文志

詩

圭

恩遠巡力竭睢陽鎮此義後人多不明一念惟知利  
祿營人靈物蠢天賦性物厚人偷真可病狗兮狗兮  
衛爾主我且羨爾獲死所爾死雖悲爾名馨愧煞千  
秋臣與僕

贈良鄉老友麗天陳三兄畫師贊僧慈海

麗天老友七十一目光如電鬚如戟雄姿抖擻神飛揚  
揚齒危髮禿軀七尺柔不茹兮剛不吐貧不移兮勢不  
屈草堂有母九十六菽水承歡常繞膝中歲糟糠已悼  
亡甘同孤雁無倫匹結交羞殺襦襪麗千金意氣爭揮  
霍排難解紛薄雲天郭解朱家勢若失有時肝膽向我  
披談天雕龍應捲舌波濤口海氣如虹不知四座驚塵  
俗一聲長嘯天地空筆走龍蛇鬼神泣

良鄉縣志

卷八藝文志

詩

三

篆籀斯隸腕底生光怪陸離爭出沒忽爾大草更顛  
狂張芝懷素皆陳迹金電難掣手中蛇滑兔何妨鷹  
眼急酒酣乘興作丹青任情撥墨無拘束霎時活現  
三神山頃刻淋漓十丈幅海立嶽飛奪化工虎頭黃  
鶴應屏息仰天把盞發高歌激昂感慨人不識漸離  
擊碎關中筑灌夫欲罷長干曲男兒有志復有才豈  
意返遭造物嫉有骨肯教世俗憐往往罄懸空四壁  
蒙袂豈甘嗟來食途窮不效狂生哭踽踽時露出世



風了了獨挺孤高質燕雀啾啾鶴一聲羣芳馥馥松  
孤直我今爲子寫平生書成寄子須三復眼中知己  
剩無幾山僧禿髻君鬢白破膽揚眉一長歌老驥何  
甘樾下伏

良鄉旅店題壁

陶元藻

篁村

滿地榆錢莫療貧垂楊難繫轉蓬身離懷未飲常如  
醉客邸無花不算春欲語性情思骨肉偶談山水悔  
風塵謀生消盡輪蹄鐵輪與成都賣卜人

和篁村原韻題壁

袁

枚

子才

天涯鴻爪認前因壁上題詩馬上身我為浮名來日  
下君緣何事走風塵黃鸝語妙非求友白雪聲高易  
感春手疊花箋抄稿去江湖沿路訪斯人

良鄉縣志

卷八藝文志

詩

七

良齋午日

雲間

沈炎曦

方烈氏

時逢佳節署逢良槐影參差滿畫廊肩壽不須長命  
縷清平何用辟兵方垂簾寂靜無人到啟戶蹣跚有  
燕忙荷葉田田盆內起碧筒蒲酒興初狂

良齋七夕詠同事董顯之東涿署周載公

流光荏苒又新秋久雨初晴景倍幽共道雙星今夜  
渡莫因觸緒動離愁

簾前新月掛銀鈎金井梧桐影動浮賜巧穿針何處

事且吟短句賀牽牛

停杯翹首望銀河天上人間誰悵多  
歲歲相逢猶恨遠年年契濶更如何

良署中秋

秋色平分夜氣清  
喜逢苦雨值新晴  
長空萬里浮雲淨  
大地千林落葉橫  
颯颯西風經夕起  
翩翩北鴈又南征  
旅中令節無奇策  
惟有開樽對月傾

暮秋感懷

良鄉縣志

卷八藝文志

詩

七

秋色驚人慘澹餘  
繽紛落葉滿庭除  
風聲欲撼牆邊樹  
鴈影難傳天際書  
幾度星霜青鬢改  
何時羈旅悶懷舒  
茫茫鄉國雲山外  
渺渺泮蓬近

帝居

良齋九日

再同董顯之城郭登高望月口占

鼓興登高去復來  
臨風凝望暮烟開  
五雲深處瞻天闕  
片席權時藉草萊  
隱隱砧聲從北至  
重重山色向西迴  
慇懃共坐邀新月  
照我茱萸酒一杯

小春望後四日別中都署齋

入夏臨良暑于冬轉范陽往來無定跡行止總他鄉  
乍見槐浮綠俄驚菊褪黃流光如迅駛撫景自蒼茫  
寄棲花署覩循良金石歌聲出畫廊無限幽思隔故  
里難消壯志在他方一庭快聚飛觴醉四坐聯吟走  
筆忙最愛綠陰相對處科頭箕踞共清狂

良齋午日和沈方烈原韻

四明

董元謨

顯之氏

和前題原韻

四明

周嗣繡

載公

良鄉縣志

卷八藝文志

詩

美

綠舞庭陰節候良薰風拂拂度迴廊心馳故國人千  
里影對空齋天一方蒲傘漫樹綠底醉冰臺徧插爲  
誰忙因思獨醒遺踪在弔古憑今興薄狂

又和

何須筆墨羨精良百轉推敲繞畫廊佳句每生辭故  
里芳辰偏惜寄遐方榴花映日爭含媚槐葉迎風不  
住忙我本借枝憔悴客莫禁撫景一時狂

燎崗古塔

邑人陳璠

雲霞片片出燎崗鈴鐸聲聞十里揚  
插破青霄通日午冲開碧落促風狂  
幾層瞻仰尋龍窟數級登臨禮梵王  
果是真身藏舍利浮圖古貌不尋常

### 巨浸東滙

萬派東流秀色齊潺潺不舍自河西  
蛟遊聖水迴波湧龍卧平沙驚翠隄  
一帶銀濤真鎖鑰千秋錦浪聚清溪  
長橋遠聽漁歌晚會向朝宗續舊題

### 城脚鷄鳴

邑廩例監  
候選州同黃文郁如氏

### 良鄉縣志

### 卷八藝文志

詩

七

飛聲能破曉雲紅何事埋頭阿堵中  
想是避秦人共隱桃源深處路堪通

### 遊宏恩寺

候選  
郡丞楊嘉樹彤蔭  
歸安

爲有尋幽興相攜到上方碧雲騰殿古  
春日漏山光地僻凡塵淨天高祇樹荒  
老僧勤掃雪茶鼎泛清香

### 其二

竒踪到處訪萬象悟來深問法渾無意  
耽閒似有心四山皆入畫一水忽鳴琴  
歸路聞清梵依稀度遠岑

登良鄉城遠眺

孤城聳踞登臨好  
薊北春風氣似秋  
何地不同荒景  
意誰家又送晚砧愁  
江山到處自今古  
轍迹隨緣任  
去留為喜趨庭閒  
縱目長安東望碧雲浮

玉河新柳

係楊文宗季考題

邑人甯國琮

臨溪御柳近天顏  
未許行人持贈攀  
色藉碧流分翠  
蓋陰垂玉岸  
藹青烟  
臨風搖曳逞腰細  
舞月翩躚弄  
態鮮自是  
皇恩春浩蕩  
柔條承露映波間

良鄉縣志

卷八藝文志

詩

表

其二

春風拂柳日初遲  
搖曳柔條垂嫩枝  
遠映金門籠禁苑  
近依玉岸罩流澌  
朝浥芳露新鶯囀  
夕帶晴霞淡  
月移駘蕩鮮姿  
臨碧水兩行綠影惹遊絲

玉河新柳

邑人甯

樾

玉堤兩岸拂垂楊  
輕舞春風樹樹黃  
枝隱新鶯聽宛  
轉條藏斜燕共飄揚  
淇園掩映金鋪色  
樊圃輕盈繡帶長  
綠水滌澗依  
御苑柔條弄色接流光

過琉璃河

德少司空齡

白髮蒼顏老侍臣又隨豹尾踏芳塵  
琉璃河畔穆穆柳應識三朝扈蹕人

燕谷長橋

郭秉聰

輪蹄南北阻驚濤聖主宏仁剏石橋  
一帶長隄橫綠野四時佳景晃青霄  
樓臺日映天邊過魚鳥身閃鏡裏昭  
咸濟萬民誇勝槩元恩一念想唐虞  
咸濟元恩俱欽賜坊匾

良鄉縣志

卷八藝文志

詩

五

療崗古塔

療岡如帶邑城東古塔崔嵬聳碧空  
七級芙蓉標鳳甸千年舍利韞龍宮  
北瞻漢闕風雲會南望周原雨露同  
隋代浮屠留勝跡登臨此日憶前功

鹽溝雪浪

龍門關下水潺潺流入鹽溝不紀年  
急浪翻來疑噴雪迴波激處雜鳴絃  
汀花馥馥含朝雨岸柳依依帶晚烟  
閑向關南時眺望滔滔東逝會桑乾

城脚鷄鳴

春風吹透古城曠何事德禽尙喜眠獨步逍遙音寂  
靜千驥馳驟耳喧嘩啄之到處鷄啼唱敲去移時鷄  
語便莫慮狐裘難返趙關前欲渡但聞填

崇岡西擁

良鄉疆域逼房山圖畫天開足放顏西接太行雄帝  
鎮東連滄海壯王寰遊仙詩思襟懷洒逸客琴聲曲  
調閑燕地孕靈多俊傑層巒突兀水潺湲

良鄉縣志

卷八藝文志

詩

全

巨浸東匯

眾水西來匯巨浸長橋東望浩無垠數聲欸乃漁歌  
遡一曲滄浪月色新鶴渚有聲琴韻好蓬窓無夢蓉  
花馨自從買得雲航後始識高賢泛御津

廣陽遺城

漢世膏田屬廣陽遺城猶自識封疆離離故址生秋  
草去去流民立短墻沃野當年稱負郭荒村今日嘆  
窮鄉何時迴復殘民脉誰向承明上奏章



梁公芳沼

梁公舊業傍蓮池數傾清波景色奇風遞荷香來西  
院雨滋菱實物芳陂漁舟遠遠橫秋日牧笛悠悠趁  
晚颼都運松阡今草莽誰人重識狀元碑

燕谷長橋

邑人張璟

杖策臨燕谷驅車近午天長虹塵際落斷岸水中連  
馬疾生空響人停怯倒懸褰裳無復慮舟子不須傳

療崗寶塔

良鄉縣志

卷八藝文志

詩

全

玲瓏天外影晝吐白毫光拾級攀銀漢蹲觀俯女牆  
危形斜日墜飛勢促風狂近闕輪蹄遶幾思訊梵王

鹽溝雪浪

溪古含烟冷風呼草欲鳴沙翻雪逗影浪疊水吞聲  
浴雁雲陰濕漂萍露滴清何年容釣艇一棹蕩孤城

城脚鷄鳴

鹽溝環雉堞佳氣萃城隈頓足聲斯應投超啄若開  
有鳴徹遠境無羽盪輕埃爲愛清音好遊來共舉杯

崇崗西擁

遠岫金雲出蒼松引素心晴光搖閣影飛翠逼庭陰  
日豁千巖秀懷舒萬壑深西窓凝落日天半老猿吟

巨浸東匯

伏流合聖水東下湧飛湍萬里孤城邁千秋一帶看  
魚眼愁浪激龍躍喜雲攢潺潺如不舍鼓棹問桑乾

廣陽遺城

沾巾憑古淚五壘石苔蒼代遠墉痕失時移草徑荒

良鄉縣志

卷八藝文志

詩  
全

曉烟啼鳥雀落日踐牛羊滿目風沙蔽蕭騷憶廣陽

梁公芳沼

名第傳金代流徽奕世遐人偕時共古沼與日俱華  
鷺立橫隄柳鴛眠片石霞梁園堪比詠詩酒縱豪誇

燕咎長橋

蘇之屏

德化潛蛟出谷遊光涵上下玉中浮未雲龍現橫都

野不雨虹飛跨

御溝道濟萬方能利物力擔千古

豈隨流天津自是通車馬何用漁郎擺渡舟

燎崗古塔

高標卓碧萬峯巔仰止都瞻一着先累級苔痕僧履  
蹟殘章鳥篆佛心禪雪明倒影埋隋月風細綸音出  
梵天覲露真機描不得筆尖摹寫倚雲邊

鹽溝雪浪

北溟衍脉一源流月島霜林此處收聲碎寒濤疑海  
市光搖飛瀑認滄洲朔風鱗甲增波面漲雨雲雷捲  
石頭萬斛明珠留不住平傾白雪滿鹽溝

良鄉縣志

卷八藝文志

詩

全

城脚鷄鳴

仙禽何日入塵埃靜養潛孳地裡胎細響遙通天上  
日清音遠出劫中灰四時罔報芳名隱五德能全彩  
色絃散步城邊熟審聽雛聲悅耳漫徘徊

崇崗西擁

張祖澤

疊障重臺列兌方配龍合局應崇崗多生介士朝天  
闕出將英賢弼聖邦春媚錦屏開右翼雪明玉壘映  
東廊驅山鞭斷根猶在虎峙雄風壯廣陽

巨津東滙

西來萬派盡朝宗日沐恩波大澤東鄉邑滌沾坎水  
德桑乾鎖鑰震龍功禽魚有賴生機實水月無情色  
相空莫道山川無意氣周旋天地一盤中

廣陽遺城

創闢匡城自漢家歷來名代遞年華四村延接皇都  
柳九陌爭迎御苑花載道口碑宣德政附山里老納  
桑蔴渾然朝堊堯民樂滿地絃歌到處賒

良鄉縣志

卷八藝文志

詩

六

梁公芳沼

一鑑方塘百畝開昔由國士品蓮來紅衣襲日天光  
下綠蓋輾雲波影迴掬水沁心月在手弄花香液露  
沾懷攀蟾啓後徵千古忝賦名賢愧短才



